

"SunS" à empeà i motores te Fascia... coi "Bastard"!

Istituzioni e sociazions adum per meter a jir l gran festival de musega de la mendranzes. E a "Grenz Factor", canal de selezion ladina de l'event, i Bastard Sons of Dioniso ciantarà per ladin

Musega - La musega l'è n strument fondamentàl per la difuzion e l prestije di lengac de mendranza. A l confermèr l'è ruà enstadi a Moena doi testimonesc furlegn de ecezion: l musizist e ciantautor Lino Straullino, che del 2009 l'è vent "SunS" e l se à vadagnà l terzo post al Festival european de la cianties de mendranza Liet International, e Marco Stolfo, esport de musega e de mendranzes e autor del liber "La mè lenghe e sune il rock".

L'ocajon per la prejenza di doi ghesc furlegn è vegnuda da la prejentazion ofiziala de SunS 2013, stata enstadi a La Grenz a Moena, olache Stolfo à rejonà apontin del panoram e de l'evoluzion musicala ti lengac de mendranza tel Friul e te etres raions de la Tèlia, e dapò, dò na picola cena golousa enignèda dai chef Sergio e Martino Rossi del Refuge Fuciade, Lino Straullino à fat demostrazion pràtega con sia lezion-conzert de coche ence la tradizion pel crescer e mudèr, doventan produzion de autor moderna e adatèda ai tempes, ma senza perder chi carateres sciantives che amò anchecondi desferenzia e permet de recognoscer "l'enema del teritorie" te desvaliva sorts de musega.

SunS: na gran ocajon per nosc raion

La gran neva l'è la conferma che SunS, l gran konzert che cern fora la mior cianties ti lengac de mendranza de duta la Tèlia e la Èlpes, chest an l rejonarà ladin, e l vegnarà endrezà apontin a Moena, tel teater de Navalge, ai 9 de november.

A se tor sù la gran endesfida, en prima linia l'è l Servije Mendranzes de la Provinzia de Trent, con l didament de la sociazion La Grenz per l'aspet tecnich-artistich, de la Region Friul e de Radio Onde Furlane che met a la leta l'esperienca concostèda ti ùltimes 5 egn, canche SunS è stat endrezà apontin tel Friul, e amò apede con l'APT de Fascia e l Comun de Moena per la logistica e con la Usc di Ladins, l'Istitut Cultural e l Comun General de Fascia e l'Uniu Ciantauturs Ladins che deida a tor ite duta la valèdes ladines.

A prejentèr l'event e l bando, apede a Stolfo e Straullino, enstadi a La Grenz l'era la dirigenta del Servije mendranzes Marilena Defrancesco, l president de La Grenz Enrico Tommasini e l diretor de l'Istitut ladin e component de La Grenz Fabio Chiochetti che i à portà dant i detaes de la neva.

Gropes e musizisc da la Tèlia, la Svizera, l'Austria, la Slovenia e la Franzia pel tor pèrt prejentan na ciantia ti lengac de mendranza (sardo, furlan, todesch, albaneis, franco-provenzèl, ozitan, sloven, ladin, catalan, romanc, croat, romani, grico). Sarà da 6 a 8 i toc che podarà vegnir portè dant al konzert de SunS a Moena, e i vegnarà selezionè anter duc chi che manarà ite l'adejion e la registrazion



La dirigenta del Servije mendranzes de la PAT Marilena Defrancesco, à prejentà SunS a La Grenz, ensema con Enrico Tommasini, Marco Stolfo, Fabio Chiochetti e Lino Straullino.

de sia ciantia (che cogn esser n toch original) sun CD o MP3 dant dal prum de setember 2013 (l bando vegnarà publicà te curt temp sun www.suncontest.com).

Anter chisc te la serèda de SunS vegnarà fora doi venjidores, un cernù da la juria tecnica e un dal public, che i se vadagnarà n pest de 1000 euro e l derit a tor pèrt a la finèla del Liet International, l festival de maor emportanza per la cianties de mendranza a nivel internazionèl.

Na selezion specifika per i ladins: Grenz Factor

Apede a la selezion generèla avèta a duta la mendranzes, per i ladins l'è na oportunità de più de se vadagnèr l'azess a SunS. Defat la sociazion La Grenz à endrezà l concors "Grenz Factor 2013" avèrt a gropes e musizisc de nosc raion, en colaborazion con l Zenter joegn de Moena.

Apede a la partezipazion e a la premiasons pervedudes dal concors (regolament sun www.lagrenz.org), de gra al didament de La Usc di Ladins, l'Istitut Cultural de Fascia e l'Uniu Ciantauturs Ladins, na

premiazion spezièla de chest concors è resservèda a la mior ciantia per ladin, che se vadagnarà apontin l derit a tor pèrt diretamente al gran konzert de SunS ai 9 de november.

Per tor pèrt a "Grenz Factor", ge vel se scriver ite dant dai 31 de messèl. Per 4 sabedes, ai 7, ai 14, ai 21 e ai 28 de setember a La Grenz vegnarà endrezà i concers de selezion e en sabeda ai 12 de otober tel teater Navalge a Moena sarà l konzert final.

I "Bastard Sons of Dioniso" ciantarà per ladin!

E apontin lèda al concors de La Grenz l'è la gran neva! Defat l konzert finèl de Grenz Factor arà desche ghesc de ecezion adertura i joegn musizisc che se à vadagnà nonzech nazonèl con la partezipazion al Song Contest televisif "X Factor", l Bastard Sons of Dioniso se prejentarà su la paladina del teater Navalge de Moena ai 12 de otober con na ciantia per ladin, desmostran ai joegn de noscia valèdes cotant che ence n lengac de mendranza pel esser sci adatà che l'ingleis ence per musega joena, pop o rock.



Lino Straullino à portà dant a La Grenz eemples de l'evoluzion de la musega tradizionèla.



I Bastard Sons of Dioniso ciantarà per ladin a Moena al konzert finèl de Grenz Factor, olache i gropes ladins pel se vadagnèr n post per SunS.